



Branch YMA Executive meeting vawi 14- na thutkhawm a ni

Branch News

Chanmari West December 4 : Chanmari West Branch YMA Executive meeting vawi 14-na chu Ni 27.11.2011 (Thawhleh) zan khan an thutkhawm a, he meeting ah hian YMA memberte'n Krismas Carol Service neih chungchang leh halpuah leh a kaihnawih khap chungchang rel a ni.

Hemi zana meeting hian Ni 18.12.2011 (Sunday) zan inkhawmban hian Branch pum huap Krismas Carol Service neih nise tih a rel a. He hun neih tum a nih avang hian section carol neih tumte pawhin lo neilo mai se tih a ni a, he carol service hi a tul ang leh buaipui ngaite lo buaipui turin Branch YMA OB te leh Section tin Leader te ruat an ni.

Kum 2012 atana hruaitu thlan programme tur duan a ni a, inthlanna hmun tur Primary School tih chu remchan zawkna avangin Middle School ah sawn a ni. Inthlan programme hi Issue leh ah kimchang zawka rawn tarlan a ni ang.

Zofa Cultural Club (ZCC) ten Zawlbuk sak tanpui nana ` 10,000/- an pe leh Chanmari West Mistiri Association ten a tul ang hman tur Cement plate pali (4) Branch YMA an

rawn pe chu committee chuan an chungah lawmthu a sawi takzet a ni.

Kumin Krismas lo awm tur denchhen hian vengchhunga miharsa te hnenah krismas present pek leh nise tih rel a ni a, section tinte mahni section huamchhungah hetiang ang mi an awm a nih chuan Ni 10.12.2011 (Inrinni) aia tlai lovah Branch Secretary hnenah list feltak siama hriattir theuh tura ngen an ni bawk.

Chhiatni Fund kan khawnbelh luh tawh dan hetiang hi a ni.

N-Section	- ` 8,970/-
V-Section	- ` 9,460/-
K-Section	- ` 10,050/-
T-Section	- ` 14,790/-
CH-Section	- Nil

Tun dinhmun ah Chhiatni Fund Account bikah ` 1,400/- vel kan la neih thu ngaihtlak a ni bawk.

Ni 1.12.2011 zingkar khan kan Bialtu MLA Pu Lalthanzara'n YMA Zawlbuk kan sak chu a hmunah min rawn ensak a, a fund atangin Rs 1,50,000/-min pe a. Tin, Central Road pawh a hmunah en nghal a ni a, a ruahmanna angin Ni 2.12.2011 zingkar khan PWD EE in hmalak dan tur a rawn en nghal a, hma min laksaktu Bialtu MLA chungah lawmthu sawi a ni.

Kan Branch Asst. Secretary Pu K. Darthantluanga Office Duty a Darlawn lam zin pawh dam takin a lo haw e.

Section leh Sub-Committee te report thelut tura kan in ngen na ngaihtlak pawimawh hram turin kan in ngen e.

CYMA NGENNA

Mizoram Sorkar chuan kum 2011 Krismas leh Kumthar 2012 vuakveta Halpuah leh Halmawi zawrh leh hal a khap a. Halpuah leh Halmawite hi mihringte tana tangkaina nei lo, hriselna tichhe thei, a lo thlawna sum tam tak sen ralna a nih bawk avangin, Central YMA chuan mitinte Halpuah leh Halmawi zuar lo tur leh hal lo turin a ngen a, Sub-Hqrs./Group leh Branch zawng zawngte mahni huamchhung theuhva hma lo la turin kan inngen bawk a ni.

Tin, Silai lem a mu kahchhuah theih naupangin an hmang thin hi Central YMA chuan tha lo a ti bawk a, heng silai lem hi mi tam takin chhiat phah nan an hman tawh avangin, kan fate lei sak lo turin nu leh pate kan ngen bawk a ni.

NGENNA

Kum 2011 Krismass leh kumthar 2012 chu kan lo thleng tep tawh a, Krismass hi mitin ten hlim leh lawm taka kan hman theuh kan duh a ni. He hunpui lo thleng turah hian Mizoram Sorkar leh Central YMA chuan, Halpuah leh Halmawi hal leh zawrh leh naupang silai lem a mu nei zawrh leh hman a khap a, he khapna thupek hi kan Branch YMA pawhin kan vengchhungah khauh taka ken kawh kan tum avangin, heng halpuah, halmawi leh silai lem a mu nei te hi kan vengchhunga dawrkai ten khawngaih taka lo zuar lo hram turin kan in ngen a ni.

Tin, Halpuah leh halmawi hal te silai lem a mu nei kah thinte hi, sum tam tak a lo thlawn a kan tlakralna leh, mi engemawzatin chhiatna an lo tawn tawhna a nih bawk avangin, hetiang harsatna hi kan veng mipui ten kan tawrh lo na atan kan vengchhungah ti lo turin mitinte kan in ngen nghal bawk a ni.

Naupang sikul chawlh te a lo hnaih chhoh tak avangin, sikul chawlh chung hian naupangte khawlaiah leng chhuak tam lo turin kan in ngen a. Zana phei chuan chhuak lo turin kan in ngen a. Nu leh pa te pawh kan fa te khuahkhirh hram hram turin kan in ngen a ni.

HNATLANG

Ni 6.12.2011 (Thawhleh) zingkar hian Thlanmual samfai hnatlang neih tur a ni a. YMA member atam thei ang ber thawkchhuak tura ngen kan ni e.

(T. NGURKHUMA)
President

(R.L. THANHNUNA)
Secretary

TUNKAR CHANGVAWN
| I rit phurh chu LALPA chungah |
| nghat la, tichuan anin a tichak ang |
| che; Mi fel chu engtikah mah |
| tihngin a phal lovang. |
Sam 55:22

Editorial Board

Editor

RK.Rozidinga
9436142304

Joint Editor :

RK. Malsawmkima
9862578441

News Editor

Tv. Thangkuma
9862303135

Pu Vanlalhluta
9862366308

Tv. Vanlalfawna
9856301975

Cir.Manager

Johny Lalthanpuia
9612359161

Jacob Lalrinsanga
9612319779

Production

Manager
R.Lalmachhuana
9436151817

Branch Office Bearer

President

T.Ngurkhuma
9436190843

Vice President

R.Lalmachhuana
9436151817

Secretary

RL.Thanhnuna
9436152760

Asst. Secretary

K.Darthanthuanga
9436196071

Treasurer

C.Lalzarliana
9436142049

Fin.Secretary

Lalthuamluaia
9612216649

Advisers

Pi Zamanthangi
Pu Vanlalsawma
Pu Rothuama
Pu Lalbiakthanga
Khiangte

Nang erawh chu engkimah fimkhur la, hrehawm tuar la, Chanchin Tha hriltu lam hna thawk la, i rawngbawlina kha hlen rawh. II Tim 4:5

Editorial :

Krismas leh kum thar vuakvet a ni leh ta a, tun hma deuh atanga kan lo tih thin angin huau huau leh eng eng emaw tih khawm pawh a tam leh ta hle mai. Tunah phei chuan Krismas dawn hnaiha huau huau siam hi a tur ve rengah kan ngai tawh ni hialin a lang. A mak hran lo ve. Mizo thalaite hian engnge kan awh leh kan duh? Mi ram tih dan leh neih angte hi neiin ti ve ta vek ila kan dinhmun hian a zo ang em? Ram hausa, ram chung economics dinhmunah thlaphanna awm lem lo ram angte hi chuan thalaite intihlimna tur leh intawllenna tur hi lo buaipuiin lo vei ta hle pawh ni se thil awm tak a ni a. Keini ram ang, thawhchhuah nei lo, pek khawm nghak ringawt, min pek loh chuan tam hmabak ang chi tana thalai intihlimna leh intawllenna, huau huau lama kal thui lutuk hi thil tha a ni ang em? Heng ang ram changkangte tih ang hi hmuin hria pawh ni ila, awt ve pawh lo ni ta ila, heng ang zawnga ke pen a kal ve tak tak tur hian kan ram ei leh bar dinhmun, kan nunphung hian a zo ang em? tih hi ngaihtuah tham tak a ni. Nawmchenna hi mihausa leh lal ropui tak takte pawh lo tlawm tawhtu a ni a. A hausa zual deuhin an daih rei deuh hlek a nih pawhin a tawpah chuan nawmchenna chuan a keuh tlu tho tho thin a ni. Hetih lai hian hausa bawk si lo, neih nei bawk si lo, nawmchenna lama inhman leh nghal phei chu 'Vahmim akara mawng tawih' tih ang mai a ni. Chuvangin kan ram ei leh bar dinhmun mil tawk zela huau huau lam hi Mizo thalaite hian kan kalpui chu a ngai ta hle a ni.

Article :

CHANMARI WEST vrs FOOTBALL

-Mangheta Ralte

Kan ngaina, kan tuipui, kan buaipui, kan insual phah, veng pumin kan hmingchhiatpui tawh. Zep thu a cheng lo; kan veng baka Football-a rualawt leh ngaisang hi Zoramah hian an awm bik dawn em ni? Chuti chung chuan Mizoram pum huap inelna lian thamah Champion chu sawi loh, Final tak ngial pawh kan la lut lo hi chuan ngaihtuahna a tithui duh hle mai. Inter-Village a ni emaw, Central YMA buatsaih a ni emaw, tournament lian tham kan hmachhawn dawn apiangin – "Champion tura rinkai pawl kan ni" "Players en chuan kan Veng aia tha an awm bik lo" tiin kan inhmu lian ve viau. Mahse..... kan veng aia thiam bik lo leh tha bik lo nia kan hriatte'n Final an khel a, an Champion leh mai thin. Engvang nge ni ta ang le?Football lam zirmi (expert) ni kher lo tan pawh he zawhna chhanna hi chu rilruah a lo lut ve nghal mai a. Mahni hmuh leh hriat phak tawk atangin chhan tum ta ila. "A che che sih hlawkah" tih ang deuh khan "A hua hua chu in ni mai" Football-a hmasawn tur hian, Players, Coach, Manager leh Organising Body (Sporting Club/Football Sub-Committee) te hian mawhphurhna hran theuh kan nei a, tun tumah chuan Players bikte'n kan TIH TUR leh TIH LOH TUR te lo tarlang dawn ila.

i) MAHNI THUNUNNA : Kan veng Football players thenkhat (a tam zawk mah) hi chu an Discipline a tha lo a ni satliah mai lo va, Discipline hi an awmzia an hre fuh lo hrim hrim niin a lang. Coach emaw, players dangte emaw thlir mail ova, mahni inthunun (Self-discipline) hmasak a ngai. Thununna hnuaia awm thei lo mi chu eng kawngahmah a hlawhtling ngai lo. Field chung leh pawnah mahni inthununna tha tak kan neih hma chuan kan inkhelhnaah hian kan hlawhtling ngai lo vang.

ii) TUMRUHNA/INPUMPEKNA: Football khel hi intihlimna ang vel chauh va ngai kan Veng Football Players zingah hian kan la tam mai. Peih chang changa chauhva Practise tur emaw kan ti a, kan tum a hniam tlat. Tournament khelh dawn pawha Champion tumna tak tak rilru pu miah lo, khel ve mai mai kan la nit lat hlawm. Tournament khelh tum ve si, chhuanlam kan ngah lutuk te hi inenfiah a tul khawp mai. Practise aia ngaihpaawimawh, kan eizawna leh tul tak tak ni si lo, kan ngah lutuk. "Birthday, Pass lawm, Mo lawm" tih vel, kan tel lo pawha miin an tih theih reng hi kan ngai hlu lutuk a, "Veng/Club aiawha khel tura thlanchhuah bik kan nihna hi kan hrethiam ngai lo. Hetiang rilru pu chung ringawt hi chuan hlawhtlinna hi a la hla deuh mai thei.

iii) NUNGCHANG/RUIH THEIH THIL:

Tournament khelh dawn apianga Veng mipuite khawngaihna dil a, VEHBUR khawn thin kan ni. Players te hian kan theihtawp kan chhuah phawt chuan veng mite hian min tanpui an inhuam. Chutih a hnekin, kan Football pet tur leh kan Ballboot bun tur leina tur pawisa thawhtute hmaizahna nei map lova khawlaia kan han rui thle mai thin hi chu veng mipuite rilru hi a NA thin asin. Chak loh apiang maia "Chumi khami chu nizanah a rui em a nih kha" tih te "Practise an kal thatchhe em alawm" tih chhuanlam ngaihthlak hi veng mipuite hian an kham tawh asin. HARH A HUN TA. State aiawh, Department Players leh 1st Div. Players kawl ve reng chung a hma kan sawn thei miah lo hi Players zawng zawngte hian kan mawhphurhnaah i ngai theuh ang u.

Heng kan sawi bak pawh hi Players te hian tih tur leh tih loh tur kan ngah ang. Mahse heng chauh pawh kan hriat leh kan zawm hian hmasawna chu a ni reng reng. Chutih rual chuan Players te in lo thawhrim tawhnate kan hriatpui che u. Tih tak meuhvin, tih tak meuhvin players te hian i bei ang u. CHAMPION NO MAWI hi kan ban phakah hian a awm ve reng a, mi veng ta tur a ni bik lo. Mahse a dawngtu turte hian a MALSAWMNA dawng thei zawng hian kan nung lo mai zawk a ni. "Miin a theh apiang, chumivek chu a seng bawk dawn si a" (Galatia 6:7) tih ziak a ni si a.

CHAWNGBAWLA

Ni 6.12.2011(Thawhle) zan hian Pu Vanlalhnema te in ah Section committee neih tum a ni a, memberte kal theuh thei tura hunawl lo insiam turin an inhriattir.

Kar hmasa inrinni khan Section bungrua siamthat leh kuang duan hnatlang koh a ni a, thingpui lumsaktu Pu Hmingmama te leh Pu Fela te chhung chungah lawmthu an sawi. Hemi ni hian gas thuk pahnih siamthat a ni a, gas thuk thar ` 3000/- man an lei bawk.

NEUVA

Ni 1.12.2011(Ningani) zan khan committee wawi 13-na neih a ni.

Nimin Inrinni zingkar khan Section Faina Hnatlang neih a ni.

An hruaitu Pu Lalremruata Saithah-a zin leh Tv.R.Zoramthara Hortoki-a zinte damtakin an lo haw leh ta.

Ni 6.12.2011(Thawhle) tukthuan eikham ah kuangduan, bungraw chinfel leh tukverh siana hnatlang neih tum a ni a, section chhunga mistiri leh member am thei ang ber hnatlang turin an in ngen.

Pu R.Lalnuntluanga'n Drive slow reflector a pe leh an Secretary in khawhar hlabu pahnih (2) a pe chu an lawm hle.

An member Tv.Lalremruata S/o Zaithanmawia National Sub-Junior volleyball khela Kerala-a Mizoram aiawha kal chu an chhuang hle.

An member Nl.Malsawmkimi (Tetei) D/o Lalremruata Saithah-a Health Worker hna a hmu chu an lawmpui hle.

Pu G.Zama in leh Pu Zonunsanga in inkar side-drain a bawlhhlawh paih thin te a bulhnaia awmte tan rimchhia leh hnawksak a nih avangin paih tawh lo turin an in hriattir.

TAITESENA

Ni 1.12.2011(Ninga) zan khan Pu C.Lalfela te in ah committee neih a ni a, thu pawimawh tak tak rel a ni.

Krismas leh Kumthar vuakveta mipuite kan lo him zawk nan section chhungah Ni 17.12.2011 atang hian duty leh tum a ni a, memberte lo inring theuh turin an in ngen lawk.

YMA AW semtu leh mitthi buhfai khawntute thahnemngai leh zual tura ngen kan ni e.

(T-Section Report chbunzawmna)

Nimin Inrinni nileng khan thutthleng rawng hnawih in hruaitu hnatlang neih a ni.

Thutthleng rawng kah nana khawl hmantirtu Pu P.lalramliana chungah lawmthu an sawi.

Ni 2.12.2011 khan Chhiatni Fund ` 14,790/- thehluh a ni.

Chhungtinte mahni in leh a vel vawngfai theuh turin an in ngen nawn leh.

VANAPA

Ni 8.12.2011(Ninga) zan hian Pu Zosangliana te in ah Section committee neih tum a ni a, memberte kal theuh thei tura hunawl lo insiam turin an inhriattir.

Ni 6.12.2011(Thawhle) zingkar Branch-in thlanmual samfai hnatlang a neih turah member a tam thei ang ber thawkchhuak turin an inhriattir.

Pu Lalremmawia leh Pu Lalchhanchhuaha ten fapa thar duhawm tak an nei a, an lawmpui hle.

Section chhunga dawr nei zawng zawngte Krismas leh Kumthar vuakvetah halpuah leh puak thei thil zuarlo turin an in ngen.

Nl.Lalrimawii D/o R.Vanlalsawma chuan Ni 9.12.2011 hian K-Section lamah pasal a nei dawn a, an lawmpui hle.

KHUANGCHERA

Ni 6.12.2011(Thawhle) zan hian Section committee neih tum a ni a, memberte kal theuh thei tura hunawl lo insiam turin an inhriattir.

Ni 6.12.2011(Thawhle) zingkar Branch-in thlanmual samfai hnatlang a neih turah member a tam thei ang ber thawkchhuak turin an inhriattir.

Khua a thal chho tan tawh a, kangmei tichhuak lo tura fimkhur turin chhungtinte an inchah.

Gas dinhmun : Pu Dengthanga point ah Card No. 26 atanga sem tan tur a ni. Pi Biakhluni point-ah Card No.161 atangin sem tan a ni ang.

CVTTPNEWS

Ni 17.12.2011 hian CVTTP Liabrary khar a ni ang.

Ni 16.12.2011 zan dar 7:00 hian Liabrary Building-ah kum 2012 hruaitu tur thlanna neih a ni ang.

Ni 10.12.2011 hian ni lenga hnatlang koh tum a ni.

CWSC NEWS

Section tina Local Council hruaitute leh Sporting Club hruaitute vengchung tlawmngaita hnena tanpuina kan khawnte aranglama tifel turin an in ngen.

MFA in Under 17 Football Tournament a buatsaih ah kan veng VC team te chu Ni 2.12.2011(Zirtawpni) a khel tur an ni a, an tumpui tur Chhipphir an lo kal loh avangin work-over (3-0) in an chak. Kolasib Diakkawn nen Ni 8.12.2011(Ninga) zing dar 8 hian an khel leh ang.

CWSC Vice President leh Volleyball Sub-Committee Chairman Pu Lalthanzuala chu Aizawl District Women Volleyball Team Coach atan ruat a ni.

ZCC NEWS

Ni 6.12.2011(Thawhle) hian nilenga Indoor Stadium-ah member pum huapin intihlimna neih tur a ni a, zan lamah member-te pualin 'Chheihlam' intihsiakna neih a ni bawk ang. Chhun lam programme hi dar 10 a tan tur a ni a, memberte kim vek tura hriattir kan ni e.

Ni 30.11.2011(Nilaini) zan khan Blue Wave Recording Studio (Pu Lalbiakzuala Sailo) ah Rallu Lam Drama, A.I.R. a mi tur recording neih zawh a ni. Studio neitu Pu BZA chungah lawmthu an sawi. Tin, Drama script ziaktu Tv.Lalrinngetha chungah leh drama changtute zawng zawng chungah lawmthu an sawi bawk.

Ni 29.11.2011(Thawhle) zan khan Assam Rifle Programme neihna Helipad ah an lam. Hnamlam chi li (4) entir a ni.

Asst.Secretary Tv.Zohmingliana nu leh committee member Tv.Lalmalsawmi pa te an chhuak tawh a, hruaitu leh member hman remchang tan in lamah kan theih a ni e.

Ni 9.12.2011(Zirtawp) chawhnu dar 1 hian an member N.lalramchhana (K-Sect.) leh Lalrimawii (V-Sect.) te chu Chanmari West Presbyterian Kohhran Hall-ah an in nei dawn a, lawmpui turin ZCC member te sawm kan ni e.

KEIMAHNI

Issue leh chhut hun Ni 9.12.2011(Zirtawp) zan hian Ed.Board ten kumtawp Meeting kan nei dawn a, Section news leh thuchhuah tur neite Tv.Mala (T-Sect.) dawrah emaw Editor te in ah emaw dah turin an in ngen.

LOCAL COUNCIL NEWS

Gas chungchang:- Chanmari West veng chhunga Gas rawn phur thinte zingah Gas bur ruak rawn zep tel thin an awm a, Gas point hrang hranga sem tu ten lo enfel hmasak phawt thin nise, bur ruak rawn phur hriat a nih chuan Local Council Chairman hnenah Motor Number leh Driver hming report tur a ni. Tin, Gas leak an rawn phurh pawhin ala duh chuan la in, Gas Agent Pi Biakkungi hnenah thleng leh theih a ni e.

Inter Village Football U-17 leh Inter Village Volley Ball kan hmachhawn mek a, Local Council ten sum kan neih loh avangin mithil phalte hnenah lehkhah kan rawn pek tawh angin sum khawn tan mek a ni a, khawngaih taka min tanpui leh turin Local Council chuan a ngen tak meuh meuh che u a ni.

Kawngpuidunga Sodium light englo te hi P&E Department-ah siam tha tura thleng mek a ni. Tin, Local Council a chan pawh Krismas hma a tih en vek tum a ni.

Local Council leh CARE Project World Vision chuan Chanmari West vengchhunga mi harsate dinhmun chawikanna tura thawk dun turin hma lak mek a ni. Hetah hian CARE Project World Vision in a lokalpui mek 'Bharat Bal Swastya Programme' hnuaiyah hmalak tur a ni a, he programme-ah hian naupang nu leh pa an mahni HIV/AIDS harsatna tawkte, Nu leh pa ten ruih hlo -in a tihbuai avanga harsatna tuarte, hmeithai fate, mi harsa fate kum 2-14, Chanmari West vengchhungah naupang 50-70 bawr vel sponsor tur a ni dawn a, ruahmanna hi tluang taka kalpui a nih theih nan veng mipuite Local Council hmalakna tawiawm tura beisei kan ni.

LR CHAWNGTHU BOUTIQUE
Hmeichhe thawmhnaw chitin thuina hmunah hian lo leng lut ve ta che.

Damdiai Vawksa rep dawr
Opposite

(1-2)

CHHUANAWM

Nl. M.S.Dawngliani D/o Lalzuiliana Ch-Section chuan PES College, Mandya Karnataka atangin Computer Engineer, 1st Division ah a pass a, hetiang mi chhuanawm tak kan vengin kan nei hi Ed.Board chuan a lawmpui takzet a ni.

Sub - Committee Report

Property Sub-Committee :-

Ni 28.11.2011 zan khan committee neih a ni a, thu pawimawh tak tak rel a ni.

Mike chhia te siamthat zel a ni a, ri theilo a awm chuan aranglama hruaitute hnenah report turin an in hriattir.

Mitthi vuina a hman thin Headphone chu a awmna chin hriat loh a ni a, hria kan lo awm a nih chuan Chairman Pu TC.Lalmangaiha emaw Secretary Pu Lalnunsanga hnenah emaw hriattir tur a ni e.

NEW HORIZON SCHOOL OF EDUCATION Day & Residential School Admission Opened

for 2012 Session

Class I - XII (Arts) Special Features :

* International Standard Digital Learning Technology hmanga zirtirna school

* Offers Spoken English & Hindi

* English Accent Training Class

* Co-scholastic activities tangkai ngah ber School

* Kumtin Board Exam Result tha kan nei thin

Class hniam ber Class - I tan Free

Admission + free frock/trouser

Contact : (0389) 2346362

9436141868 / 9612228372

(1-9)

I FANU FAPA A LO HRISEL THEIH NAN ROSANGLIANI DRUG STORE, VAIVAKAWN-AH NAUPANG SPECIALIST Dr.Mahriati A THU TA. RAWN INENTIR RAWH LE.

Inentir hun :-

Nitin Zing dar 6:30 - 8:30.

Rosangliani Drug Store
Vaivakawn

HETAH HIAN SMS LA

>>8794162539<<

Vengchhunga mitthi lumen zan hian rui chungka kal kan va tam ta ve. Thalai mimal tinte kan inenfiah deuh a ngai a ni. Vengdang hmuh ah a mualphothlak thin hle mai.

977439_58

Salvation Biakin hnuaiya bike dah hi a va awm rei tawh ve. A neitu an awmlo em ni aw.

961547_45

Mitthi in hi politics khelhna hmun leh mahni intihlar na hmun a nilo tih hriat a tha. YMA leh politics hi chawhpawlh lo hram ang u..

986220_96

Mitthi lumen ngai kan neih hian nu leh paten kan fate mitthi in a kal ngei turin i fuih thar leh ang u. Mipa mai an nilo hmeichhia thleng hian mitthi lumen tura in atanga chhuak ve si a bul hla deuh a lo awm an awm fo mai hi a zahthlak hle a ni.

961215_30

Hunpui kan lo thleng leh dawn ta a, nu leh paten kan fate Biakin lama tal tam tur leh zan a vak mai mai lo turin tun atang hian i khuahkhirh ang u..

897120_21

Insakna bungrua khawlaia leh kawng dala dah kan la awm fo mai hi i sim teh ang u. Kawnga kalte leh lirtheia kal te tan a hnawk thin tlat.

943636_90

YMA hruaitu kan thlan ah hruaitu tha leh khawtlang leh veng tana mi tha kan thlanchhuah chuan keimahni Branch tan a ni tih kan hriat theuh kha. Member sang chuanga hian 200 pawh tlinglo kan kal thin hi chu a ngaih pawimawh loh thlak thin em mai.

986221_87

Section ten kumtira project-a an lo neih tawh intihlimna engemaw thil avanga Br.OB ten an han thulh tir ringawt mai hi chu a section dah hniamthlak viau lo maw. Executive chin tal in ngaih tuah zawk nise.

943635_04

(SMS kan dawn te hi Ed. Bd ngaihdan a ni vek kher lo)

CHAM CHAM STORE

Chanmari West. Aizawl. C-85/01A

Ph. 9436352887 / 0389-2348162

Hengte hi kan ti thei e.

Xerox, Lamination, Photo Block Lamination, Passport Size, Spiral Binding, Invitation Card, Visiting Card, Signboard, Baner designing etc.

Photo quality tha tak water proof
Camera, Mobile Phone etc. atangin kan print thei.

